

泉州府志卷之六十一

樂善

泉土瘠民貧一二素封之家類皆口約腹裁自營什一之利外此或經商於吳粵或泛航於外國其致之匪易則其出之也不輕於是計錙銖析秋毫有甘受鄙吝之誚而不辭者惟夫好施者流見善如饑赴義如渴凡郡邑大役以及橋路寺觀恆傾囊倒困以濟其他憐貧周急恤孤助喪皆出於中心之樂從而無所強彼固謂天地生財勢難適均酌盈劑虛不必視爲己有也若乃家無百畝產僅中人遇有義舉猶竭力捐貲以應之室內常空晏如也

國家下旌勸之典凡慕義好施者授爲職官榮以冠帶自督撫大吏以及郡邑長亦時賜額以褒之視夫擁厚貲利子孫卒之泯泯無聞與草木同腐者竟何如

耶志樂善

唐樂善

黃守恭先光州固始人移居泉州樂善好施人稱長者垂拱閒夢一僧乞所居地爲寺唯之曰樹產白蓮乃可越

二日桑樹果開蓮花遂捨宅以建卽今之開元寺僧人
爲立祠禪堂之左世祀之子四經紀綱綸分居南惠溪
同四邑後皆蕃衍稱爲四安黃氏

宋樂善

陳彥達

李密 李國表

謝應瑞

劉君輔

陳彥達晉江人家富篤義時出私財助公見人貧乏惠濟
之讀書手不輟卷舍南數武爲別館中堂設圓牀環榻
與朋友共食士無資者就彥達昕昏食飲寒暑裘葛沖

泉州府志

卷之六十一 宋樂善

二

膏紙筆之費皆無所吝鄭俠名其齋曰尙友而爲之記

書閩

李密李國表俱晉江人向義樂施郡南六里陂下漑七十
二埭居晉邑田賦三之一自五代時吳公創設四陡門
內蓄溪流外拒海潮至靖康元年崩壞密與國表請於
邑令洪元英卽命二人董其事乃自捐千金與僧祖派
體柔于紹興六年定基築造加設二閒遂稱六陡門歷
三年告成又慮歲久復壞會四十三鄉請郡縣設陂夫
官給工食於上高下瀉之處立數涵定期啓閉木印封

固以垂永久明僉事李墀作增築六陡門記尙寶卿李

源勒諸石

節碑文

謝應瑞晉江人淳祐六年郡飢自出私錢四十餘萬糴米

賑人詔補進義校尉

閩書

劉君輔字仲佐號西橋晉江人生淳祐閒仕宋主簿幼失

怙及長竭力經營置田南同二邑計三十六庄租八萬

四千石外復有山林地稅於祥芝本里構孔聖廟像又

構書塾於芝山延邱葵林興祖諸名宿教子姓歲出粟

三百石爲師徒俸膳之費興建慈濟宮金沙接待院海

泉州府志

卷之六十一 宋樂善

三

會堂古山庵龜湖東庵青蓮院豐山巖塘邊巖重修虎

岫寺其餘庵廟壇榭脩葺者莫能枚舉年七十一卒

元樂善

趙深道

劉益

趙深道晉江人樂善好施至正甲午歲歉飢殍載道深道

於中和堂設粥令飢者列坐供之所活甚衆旣而大疫

死者相枕藉深道造舟施輪其下會衆僧以長繩挽拽

沿街搜索或遇門閉輒排以入舟挽各城門外埋瘞之

日不下數次有司以聞于朝旌表其門曰義士

舊志

劉益字有諒晉江人由良家子弟帥義兵從帥府討山寇
呂甫以軍功補官至正中授晉江縣尉以運饋餉至大
都陞南昌主簿西域那兀納等據泉炮烙州民以索貨
財不得者多置於死益悉捐家貲贖之所活者甚衆咸
聚於西峯院飯僧爲益祈福後謝事家居無病而逝年

八十四 八閩通志

明樂善一

徐廻遜

李英

陳乾道

李明

泉州府志

卷之六十一

明樂善

四

張頌

胡欽

李森

李却磐

歐陽鎬

李杲

胡乾篤

蕭銘

李珏

陳樸軒

莊鐸

潘泗

林興

蔡德

徐用賓

鄭承元

陳庚

詹仰憲

涂紹淵

王汝雲

王叔中

李梯

吳良獻

林健

徐廻遜字世淵晉江人薦辟福祖子慷慨有大節能拔人難危中小弱輩藉以爲活者常數十百家先是光孝寺災獨力重建無所吝嗇又以清淨寺淺逼更拓地架堂廣之今紀德遺碑猶有存者年八十餘卒御史林潮爲立傳紀之子陟永樂庚子舉人

李英字俊育晉江鳳池里人以貲豪里中而急爲義人目

泉州府志

卷之六十一 明樂善

五

爲長者縣洛陽橋歲久海沙日積橋址下沒而風潮過當水嘗漫橋不得涉守馮禎以委英英出貲高之幾六尺凡費貲萬計郡南洋田界于海捐貲築堤堰時啓閉自是早潦無虞今其子孫多衣冠而鳳池之李爲華族

閩書叅水利功德錄

陳乾道 同安志作乾通

同安人唐陳塲老之後家富好善至老康

寧子姓滿前年九十五終曾孫華玖宏治戊午舉人 閩書

叅同安志

李明晉江竹樹人正統閒開客舍生理有永春吏解糧投

宿因醉置銀數錠計五十餘兩於床蓐下次早行急忘取去明檢得封識之月餘其人復來寓問其近况蹙然曰前月來郡因醉遺銀至今揭賠未完明立取原銀還之吏驚喜願以半謝固却之後生子源登進士官尙寶卿明生封主事享福二十餘年

近時新案

張頌字士表惠安人恤孤賑貧作家塾延名儒教子孫親戚子弟來學者悉廩之歲大疫鄉人或闔門病頌持粉漿藥物沿戶省視正統中沙尤寇發距縣四十里衆惶惑欲避頌力言縣尹當扼要堅守毋自恇擾俄有令抽

泉州府志

卷之六十一

明樂善

六

大戶轉米餉軍人洶洶謀避頌率先詣縣受米尹大喜卽委頌督餉頌勒什伍止宿輸納悉有次第暨畢事無

一亂行者

閩書

胡欽安溪人仗義好俠能以其貲爲善事天順戊寅歲大飢出粟千石助賑事聞褒異賜冠帶有司建亭旌之得蔡清於齠稚時以女妻之後果以理學爲一代名儒人

服其知人之鑒

節王遵巖文集

李森字俊茂號樸菴安溪感化里人天順中任源口司巡檢少慷慨有志尙席先貲益盡力居積乃計歲入捐粟

千斛別窖之凡親戚里中人嫁娶病葬緩急咸賑贍之
郡太守欲脩治堂筦庫森慨然任之又佐脩郡學邑治
堂過劍口渡患人病涉召匠爲造二十梁工未就有老
人語曰盍塔諸言已不見森塔之復橋莆田江口脩郡
東嶽廟及元沙觀創五帝殿寢復爲本邑建龍津鳳池
等二十五橋龍津清溪獅子等宮宇九所助脩福州芝
山寺前後費不貲而李長者之名著于閩中天順中應
詔出粟五千石賑濟又慕義輸邊粟三千石朝旨旌爲
尙義錫文綺二森詣闕進方物稱謝命宴勞之時鄉落

泉州府志

卷之六十一

明樂善

七

盜發森悉擒殺之沙尤寇掠泉森掩擊生俘酋黨餘皆
就撫上其功授漳州九龍嶺巡檢頃之從安溪民請調
源口永春德化前後缺令監司委森攝篆多惠績又攝
本邑事復脩公署建儀門百廢具舉胞弟却磐咸駢爲
義別有傳李氏子孫稱森曰旌義公森平生嗜義好施
五十年間建造經營蓋無曠時虛歲云

國朝康熙閒裔孫光地以森賑飢平賊事奏聞

欽賜急公尙義匾額

舊志
參閩書
安溪志

李却磐字俊德安溪人森之弟以曲謹聞有故人急欲貸

其兄森五百金不能應長吁輟食却帑偵知爲具如數

勸加餐與其兄俱稱長者

節安溪志

歐陽鎬南安人幼喪父旣而祖父與伯叔朞功之親相繼

淪沒鎬孑然隻身依祖母爲命天資聰敏仁厚弱冠能

奮然自樹立孝養祖母撫卹族人敦睦親戚人皆賢之

治貲漸裕先世門閥悉還舊觀值邊事急出粟助邊得

邀冠帶之賜

節蔡文莊集

李杲號愛松晉江人郡南六里陂瀦水灌田堤決水瀉農

民倉皇邑簿驅役築之累月而工弗集值東作方興民

泉州府志

卷之六十一 明樂善

八

心益急以請于杲遂捐資毅然脩之不日竣功鄉民賴

之子貫宏治壬戌進士兵科給事中

節水利功德錄

胡乾篤

閩書作乾爲

同安人父克裕有孝德偕妻雙壽至九十

一歲乾篤事親孝謹好善行義成化辛丑遇例納粟給

冠帶造余塘溪橋以利行人旣訖工請父母行橋上效

舞綵戲鄉人羨之著家訓以示子孫於赤泥山立義塚

收埋枯骨邑令龍越作忠義堂旌之子廷銘亦有孝行

閩書

參同安志

蕭銘字克純號雪松晉江人敏慧有心計與時伸縮居積致富所酬酢多合宜課僕力穡以爲儲蓄遠出徒行衣服非垢敝不易自奉泊如也事父母竭致脩髓得其歡心處兄弟友愛親歿喪葬事獨任之弗累諸弟建祠宇置祭田遇匱乏者周之橋梁圯壞者脩之丙申丁酉歲大飢發粟賑之郡太守深褒嘉焉晚於後圃築軒鑿池培植花卉招知友爲逸樂會年六十八卒司徒顧珀銘

其墓

節顧新
山文集

李珏號素軒晉江人祖瓛正統間董脩六里陂有功歷宏

泉州府志

卷之六十一

明樂善

九

治辛酉陂壞珏倡首捐資相度地宜變舊基而改築之視前加固衆復推珏掌陂事乃命季子宗綸任其役時苦盜洩珏令當適南之橋重築一埧七分提壅以爲六里之利三分中流以爲下溝之資上下交濟內外適均而舟楫亦不至於阻隔人皆便之

節水利
功德碑

陳樸軒同安人爲經歷書記成化初大小嶝民以通夷內徙委經歷查勘朴軒爲極陳嶝民化離狀且代畫保全之策經歷如指抗言之得全活者數千人建祠勒石頌

其德元孫基虞

同安志

莊鐸字世鳴號儼齋惠安人警慧特達善養親親歿殯殮
葬祭身獨任之處兄弟怡怡出入衣冠整然與人交洞
見底裏有告乏者輒周之捐百金以建忠義神祠宏治
己未歲大禋郡太守檄舉糴粟于廣以賑飢鐸往返再
四民賴以全活者甚衆年八十九卒司徒顧珀爲銘其

墓

節顧新
山文集

潘泗字德政晉江人賈於三山主鄭家與徽賈同舍徽賈
遺橐金去泗將他徙得之乃攜往別寓而時時之鄭家
徘徊者四十餘日後一日之鄭聞戶內勃磳聲疑問其

泉州府志

卷之六十一

明樂善

十

故具言客遺篋金疑吾妻利以嫁女索急女無以自白
欲就死泗大驚曰誤矣吾遲久不去正爲此也立往他
舍舉橐還之賈感泣曰吾生平拮据盡此二百餘金金
去命隨之矣非君活我幾索我于南臺江之澚願割半
以謝辭不受羣賈義之稱曰眞叟子實寬

舊志

參閩書
景璧

集

林興字廷讓號逸齋安溪駟嶺人入粟助官旌爲義民嘗
言逸最有趣世鮮有得之者潘居正悅松泉之須陸魯
望任江湖之散亦若得之矣而未見其深也在人境無

車馬之喧見南山有悠然之適斯深於逸矣人聞而訝之曰義民僅知急公取冠帶榮於鄉耳安能言及此此豈尋常義民耶由是皆稱爲逸齋公有語以求田間舍者輒艷然曰我真田舍翁耶既呼我爲逸齋如何又來薰我以俗耶女妻於詹早寡遺孤源興多方撫恤俾得力學有成女以貞節見旌年七十二卒陳琛爲銘其墓

節陳紫
峰文集

蔡德字永興號易齋晉江安平人有弟三人俱早喪鞠其遺孤長爲婚娶待宗黨有恩鄉有朱子祠官重新之擇

泉州府志

卷之六十一

明樂善

十一

德董其事殫力經營食寢俱廢東西二石橋跨海數里歲久傾圯德捐貲倡新行人利賴歲飢官給直買穀散

賑推德任之貧戶均沾沒後史于光爲銘其墓

節江集

徐用賓字子尚號少浯晉江人南京戶部主事榮之子弱冠補弟子員有聲應貲例授典客出爲攸縣簿兩督粲上留曹於例羨一無所染長沙守賢之委署邑篆用賓懇辭曰行者代庖居者移擔恐忌端從茲啓耳守心服其言復督運又無所染如初廉聲四起上官咸稱其賢遷丞無錫無錫頻患歲惡苴轉者剽奪奪相屬于途用

賓嚴訊捕日設粥賑飢掩胔給櫛皆捐俸濟之民呼曰徐父尋卒于官用賓內行淳篤天性惻怛友人告匱者倒囊焚券無所恡嘉靖丙申丁酉大荒疫用賓夜衣短衣偕一蒼頭負銅錢十餘肩施之不令知姓名日則搜屍埋葬凡六十晝夜甲辰乙巳旱疫益甚時用賓家已落假貸賑捨如故辛酉壬戌倭寇充斥官私俱困賣田宅以應公役而恤飢孳仁枯骨如初計其三度施賑費不下數千人比之東漢劉翊孫縉芳萬歷辛丑進士

舊志叅閩書

泉州府志

卷之六十一

明樂善

十二

鄭承元字仁甫號梅峯晉江人潮州守良佐季子爲郡諸生有聲父歿毀瘠三年旣除服擬游上舍會母病不果貲漸落乃剖橐中藏出金錢數千緡遴二三蒼頭貿遷旁郡漸致豐裕復躬走吳越趨時觀變所至與賢士大夫傾蓋相驩百金爲壽名山大川登臨殆遍歸構亭一區脩竹數椽左圖右史嘯咏其中亭外鑿池畜魚延賓客開樽舉網浩歌自得爲人樸誠醇厚事親孝與人信父兄子姪多顯傴僂益恭性厭紛華食無重肉衣無襲綵行不張蓋施德于鄉兵燹之歲殍氓載途發困煮粥

全活無算予不任德貸不責償焚券市義分散貧人厚施而薄望蓋以儒治賈致富而好行其德者

節景壁集

陳庚號介山晉江人剛方朴直言行信於鄉事親孝及父歿撫愛幼弟尤篤家頗饒而服御澹如至大義所關則不計費嘗營父葬地度平衍可多壙分其半以葬從叔父有姻戚柯與馬姓老而寡爲買櫪以待其終親屬興居室緇道葺寺宇每捐粟數十斛助之性喜飲酒每往必與弟偕弟或不往則不醉而歸見子能讀書者厚鍾

愛之卒後丁自申爲之銘

節三陵稿

泉州府志

卷之六十一

明樂善

十三

詹仰憲原名仰成字爾憲以字行補邑弟子員曰仰憲安溪人仰庇弟敏智算善擘畫輕財喜費而恥自封郡邑大夫有興作之事輒求仰憲主治仰憲於凡木植甄瓴漆髹塗墁踊賤窳良心計目審不失尺寸工匠執技以從如部曲之隸將帥手足併赴不督自趨官役仰公帑或不時給仰憲出橐中裝先之畚鍤小人尤樂從事所作治具可堅久而家貲爲損減郡邑大夫善仰憲佐公家急親禮過當仰憲又交游諸公權洽無閒時時解紛持平於親友閒所以賑飢濟貧惟力是視窶子飢人天

且父之仰憲所爲郡邑治工作不可勝數其大者在新文廟繕泉城脩洛陽橋作嶽神廟塔溜石之灣以縮泉城風氣於清溪本邑捐貲構名宦鄉賢二祠少孤事兄仰庇若嚴父兄貴不屑以勢啖加人謙恭下士不輕干謁有司歲飢殍死相望有司開倉發帑請主其事仰憲以身自往城市村落閒隨處散給益以己貲煮粥與飢者食或分以錢人賴全活平日任事無首鼠無避勞辭怨衆危之不爲動人誹之不爲沮游閭里閒與人有所掖護歸自喜曰今日幸行一善事矣夜立中庭禱告帝鑒

泉州府志

卷之六十一

明樂善

十四

以爲常李廷機常稱其天才人傑云仰憲死他日郡城

崩學舍圯橋梁頽泉人歎曰無詹公矣祀忠義

景璧集
安溪

志

涂紹號慄齋晉江人好義勇爲筍江橋圯捐資率衆脩之歲飢道多餓瘠官勸分聚米煮粥救活紹出米獨多受獎勵值公務經費不足邑令懸格募出錢計多少予散官有差紹出錢獨多得七品散官賜冠帶戎籍有涂伯堅者戶已絕名猶繫籍中仇人指誣紹族曰此伯堅之涂當勾丁應籍以從伍族人咋舌彈指莫知所爲紹出

鳴于官淹三載乃決費至數百金未嘗銖髮及族人他義舉多類此子淵能詩爲梁家沙巡檢再除神安鎮巡檢譏禦之外不索一錢里人王慎中爲文誌其父子

王節

遵巖文集

王汝雲晉江沙堤人守約好施尙義強榦嘉靖丁亥間大雨連綿溪漲海溢留公陂之左堤決田沒民苦賠賦因循六七載適太守屠倬拯念民瘼捐俸議伐松驅石築之而難於董事衆咸謂非汝雲不爲功遂以禮致之汝雲至則矢於衆曰敢千秋毫怠事方命官有常刑於是

泉州府志

卷之六十一

明樂善

十五

協力羣作供役傳餐於家不縻公餼未終歲而石堤成太守躬詣宴勞簪花鼓樂導歸越丙申舊陂復比太守王仕俊詢于衆復以幣請汝雲纘功益力不數月竣事由是水循故道田耕而賦復晉惠兩邑世受其利後僉舉爲鄉賓司徒顧珀爲文記之勒石陂左

採顧新山文集

王叔中字道成晉江人武肅王審邽之後天性孝友樂善好施郡東岳祠旁有地祇院邑令以淫祠欲毀之叔中捐貲謀衆易廟額曰忠義亟塑陸秀夫文天祥張世傑岳飛張巡許遠關夫子蘇緘趙昂發諸忠烈神像由近

遡古事急未暇論世像既成令鮑龍過之展拜焉院得以不毀又以舊宇就圯圖鼎建而貲不給夢神告曰予助爾掘土廟前得銅鉢金銀用恰足後以子貴封戶部員外舉鄉飲大賓年七十六卒郡人義之爲構堂像祠于廟左子同讚嘉靖戊午舉人壬戌進士歷官知府

閩節

鈔書

李梯字冠夫號龍溪晉江人移居南安幼喪父事母恪恭嘉靖丙午有流寇剽里母被傷梯適在郡城痛且憤捐貲募鬪士扼賊衝擒數十人歸于官而致之辟歲飢出

泉州府志

卷之六十一

明樂善

十六

粟百餘石輸官條事宜行之藉以全活者甚衆邑令行均賦法屬爲耆正履畝考則咸服其平祖祠淺狹捐分地並易地拓建之有族姪貧不能舉婚給田十餘畝助聘娶嘗曰天道忌完神道忌彰人道忌露物道忌華君子蓄之以爲發守之以爲通明也而晦居之才也而拙用之裕也而約出之天神人物之道所由貞也人謂其言有味焉

吳良獻號北瀛嘉靖閒晉江人博學潔行教授生徒遇貧乏輒分頰閒哺教且養之晚粵東督師迎爲幕府值討

賊脅從者槩議戮良獻勸令審釋不許輒廢食全活至百數十人回家道漳州見有攜幼女投水者急問其故則因逋官錢莫償也傾囊與之抵家無以度歲晏然自得年六十四歲始生子載鰲登進士官僉事

近時
新案

林健晉江人家貧尚義歲飢爲粥以食餓者族有病疫人爭避之健叩門聞呻吟聲詢其家不舉火二日矣亟措斗米濟之嘉靖閒倭亂有族宦避兵城厝金帛籍券數千百盡委健爲周旋十餘年事定給還無失欲有分畀却不受嘗以堪輿遊漳三載值歲暮歸道遇貧嫗將鬻

泉州府志

卷之六十一

明樂善

十七

女持而哭詢狀傾懷中金十五兩盡與之至家索債者盈門妻情急伺健出闔戶投繯忽聞空中大呼曰且放他下俾生貴子貴孫其繯忽斷是年遂生子武苴後貴

贈如其官孫欲棟欲楫

近時
新案

明樂善二

胡道

陳衢

吳輝

林彥佳

李炳

蘇玉

顧應蘭

何元選

陳 哲

伍榮辰

黃一復

林文明

蘇墀宗

劉應寬

黃 昕

洪 松

黃思詔

張 遴

劉 柳

李呈春

陳以廉

洪以詵

陳存恕

田雲龍

施濟民

傅志節

泉州府志

卷之六十一

明樂善

十八

陳啓璣

謝振玉

胡道字宗緒號榕溪安溪人父誼以貢爲遂安訓導遷英德教諭卒于官道數千里扶櫬歸拮据襄葬事母盡其力見長老孫悌與倫輩敦睦接卑幼尤巽抑不惰囊無贏財有以急告者傾囊與之嘗受安溪訓導周君某寄金一篋他日隣火道適他出家人皇遽避火多遺失而篋金故在周訓導聞災拊曰亡吾金矣一日道持篋昇周曰金在此周驚喜如新獲割十金爲謝艷然曰使吾爲金獨不可利此一篋乎峻却之周大感嘆居郡城坐

客無虛日或不舍客則之他舍杯觴娛日不知日之邁

也年八十一卒子禮靖安教諭

節王遵巖文集

陳衢字孔伸號象西晉江人琛孫負幹才而勇於義衆推掌六里陂水利豫備水旱遇雨竟夕不寐策杖視水督陂夫啓放既霽閉之旱則晝夜巡行無敢私啓漏洩者舊時木石船貨過閘俱有稅或畝取其禾或家征其穀或設網罟取魚蝦視爲固然衢一槩禁革之陂夫工食如期給發官未及頒則取懷予之陂岸崩自捐三十餘金砌築不煩里旅陡門窄不足容水陡梁至缺折鬻己

泉州府志

卷之六十一

明樂善

十九

田數畝以充費改築完好又於溜石廟前增築陡門一坎濬導溪流郡南數十萬畝之田盡資沾漑邑人李叔元爲紀其事勒石于道左鄉人建祠塑像祀之

節水利功德錄

吳輝字文旭安溪人司訓彬姪嘉靖丁亥歲督學邵銳來邑視學以朱子祠遠離黌宮謀徙之輝有隙地濱於學值百金遂獻之邵欲償以直不受欲償以故祠地復不受因廉其世有義行扁仗義二字以旌之及爲滁州目兩院亦獎以扁卒於官

安溪志

林彥佳字克美安溪人居晉江歲貢生素行慷慨親族子

姪知讀書者悉邀來家給餉食之與諸兄弟通財無所吝歷教揭陽陽春所在捐俸育士晉江黃光昇張冕皆

推重之

安溪志

李炳安溪人性剛毅樂善好施

閩書

蘇玉字子琢號秋江晉江人十六歲而孤二弟一九歲一六歲茹荼披荆獨柄家政比弟成立謀析箸則以美室讓之而居其偏以良田讓之而受其礪确自搆小齋齋外爲沼環沼爲畦貯書釀酒養魚種蔬賓至熱醪取魚擷蔬應時而具客座常滿家計日落而喜客益甚時進

泉州府志

卷之六十一 明樂善

二十

兒曹談古今忠孝節義事見道有遺編卽俯拾之有遺飯卽檢置七豆上櫛髮寸莖必藏之曰此先人遺脉也性慷慨好義有里正張本欽同赴公甸不能上計簿吏持之急適玉爲仲女治裝撤奩貸八千以濟之不責償鄉有六里陂縮穀九十九溪之水入海所漑田居邑什之三掌陂者弗習水白去之請以身任陂內白鷺埕延袤十餘里某子甲利之欲築爲脩畛毅然爭曰茲地受上流九十九溪之水非綦廣不容一或隄之水潦時至民胥爲魚奈何以一家之利博萬世之害昌言於衆共

格之海濱沮洳與濤出沒隄其外可田數百鍾有薦紳
謀玉鼎分之玉曰此十班賸米也衆口難弭專欲罔濟
不如違之里有爭者諭以禍福平其伎心各散歸偶遘
疾對故人道別油油若平生曰吾順受其正足矣遂卒

子濬

採三
餘集

顧應蘭字維心晉江邑諸生少司徒珀仲孫也珀居鄉每
值凶災捐穀出賑而應蘭能承其志嘉靖庚申辛酉間
民中倭大死疫應蘭召役夫舉藁槨竹簟哀屍一萬六
千餘而髀斷髑髏且以萬具別男女而邱之郡城村落

泉州府志

卷之六十一

明樂善

二十一

在在而有而爲之志曰嗚呼在昔盛時民無菜色飽暖
以嬉死無所歸則鄰里助其葬有司埋其骸爾輩何不
幸值此時也禮葬者載柩於庭乘輻辭祖親戚姻朋執
葛紼歌蒿里爾輩何不幸值此時也蓋在萇楚之詩曰
天之沃沃樂子之無知兔爰之詩曰逢此百罹尙寐無

吡

閩書

何元選字元學號次洛晉江人元述弟少穎敏十歲庭授
章句經書傳註寓目成誦十三父歿哀毀執喪如成人
十九補弟子員弱冠游何炯之門炯目爲奇士每日講

口授畢退卽筆記閱再歲手錄疏解累十二卷築精舍於東湖臨江引曹偶互相切磨旋卒業成均嘉靖甲子順天鄉薦元選爲人倜儻英邁習於昭代典故沉毅有大畧善赴人阨困友歿子少孤家貧延歸解衣授餐給食館之其人竟以儒顯某友沒當元且慨然曰夫人身臥地不收何忍以獻歲爲解卽日捐貲市榼令家僮舁前行而身從其後觀者錯愕慕義壬癸之交倭亂歲飢貧民逃入城中殍者枕藉元選會巨族出粟哺飢全活千計復慎機詰給僱募脩器械畚休輪直具有成規督

泉州府志

卷之六十一

明樂善

二十二

撫檄郡邑爲式延致幕府令條方畧鑿鑿中窾寇退卜兆改葬祖父母置祭田營祀屋建鄉塾召子姓弟姪耕者受器讀者受書家歸三年漸施有政而嗜學日篤隆慶丁卯方束裝北上旋卒李光縉謂元選世所稱豪舉士跡其行事則恂恂儒者仁心爲質引義慷慨百里頌功千里頌名內外無閒

景璧集梅谷集

參

陳哲字敦晦號弗齋晉江人三歲喪父四歲喪母與二兄鞠於祖父母少聰慧善誦屬文詘其儕二十爲諸生翕然知名分父遺貲八之一讓腴取瘠所居屋盡畀二兄

而目營別築讀書之暇治生積穀儉用佐財貲稍進則遣家僮數十人轉販郡國營什一不數年竟致于金乃挾貲數百北走燕趙游太學與四方名士相雁行所至無不願交衣無完采食不兼味徒步行市中而喜賓客存問造請帳具無虛日族戚故交寒者衣之飢者食之婚娶不辦者資之貸子錢不能復者焚券予之授人若棄假人若忘善擘畫每從士大夫口策縣中事卒如其言邑長聞而重之造門咨訪以爲常邑安平萬福二隸受產二百餘畝先是海堤失障歲塞歲決衍溢望洋費

鉅稅逋邑令難之哲語人曰此第以隄善潰耳築令廣一二丈何患不障奈何割數百頃田授海若養魚哉令聞持羊酒踵門推爲祭酒有難之者曰隄就奪士大夫利也不就以千金委海矣哲銳身輸金爲之隄竟就安平羣盜聚百餘人猝至其庄劫求糴哲屹然不動曰豎兒我不能賑汝耶安事糴人與粟擔各羅拜謝去且告以走郡城中有應叛者晷夜馳入城白大府按捕盡獲之中年精岐黃術有病革來求者施藥應之立愈逾五十以上舍生授清豐縣丞職司馬政每綜馬使者至稽

駑良覈肥瘠時多寡不恃簿書取咎口纒纒對不休靡
弗中程使者奇之視民如子判獄若流問遺不受請託
不聽邑大飢捐俸賑之扶不干楚贖不取鍰或諷之曰
貲郎補官且奪去不以此時收息贏何待哲笑曰而欲
吾以官賈耶吾賈廉也市貨於官吾惡之益勵冰檠尋
以疾告歸抵家十三日而卒

節傳錦
泉撰誌

伍榮辰字載賓晉江安平人仗義慷慨生平未嘗欺人人
亦不忍欺之賈於粵有客誤遺百金於其寓越數日檢
得呼還之其人願割半以謝笑曰使我欲得金固不止

泉州府志

卷之六十一

明樂善

二十四

半矣卻之自是諸商益加敬重及子登賢書始趣歸歸
復廣置圖書經史文籍目覽手披老而不倦優游二十
年而卒子鳳章萬曆己卯舉人任大埔令署程鄉俱有
殊政民立碑頌德

節安
平志

黃一復字靜夫號肖崖安溪參山人三歲而孤嫡母林撫
育之志規進取厄於數奇而敦倫尙義不爲饒脂態事
嫡母養志多方脩灑奉侍而外有金錢梁肉恣所欲予
嘉靖初年永定賊行劫挾母林氏去一復日夕涕淚親
賫二百金冒白刃入賊巢贖歸人謂孝思感動云亡何

移居郡城適庚申辛酉賊勢披猖城中穀價騰湧一復捐粟五萬斤八之官以贍窶民觀察萬民英遣幣旌之歸故里見黔黎離散居室焚燎則出貲繕土堡招輯流移貧者給其衣餐漸次復業性儉嗇食不兼珍衣無重采既卒大學士楊景辰銘其墓

楊大學生文集

林文明字尙榮晉江人少磊落有大志父歿家貧乃脫身遊京師家焉治計然寬大忠信與時消息以貨賄來者得其一諾賢於十券自此漸致豐裕人盡交歡所居窮巷座客常滿泉計偕歲百數十人無論識不識襍鞍解

泉州府志

卷之六十一

明樂善

二十五

裝首至其舍出好飲食食之出湯沐沐之舍館定而後去比試爲置蠟炬果餌以爲常聲重海內尤好施予視人之急勝於己有王冏卿載綺繒直數百金斥賣都市市人以次來受賈既而賈皆敗業不能償王屬所善緹騎帥徵之急文明惻然曰奈何以數百金傷數十命哉割橐中裝代償之家資去逾其半既而貢生莊待試闕下主王所暴卒其僕以遺椒鬻文明越三日發椒中有金二百大驚曰此莊物也不幸客死忍掩其金乎亟呼其僕歸之是時王爲莊錄遺橐方急僕僕啐啐無所

出及金歸叩頭出血謝云非公者奴死矣王聞亦亟爲謝生平爲義非一飢待而火者寒待而衣者斃待而糶者藏待而土者旅待而裝者齋待而供者橋道宮寺待而成者無虛月日而其所最急者諸武胄襲職窘不能計者以告輒先後濟之曰若皆世世稱戶侯無令以窘故失其職後產且中挫所親規以早爲子孫計謝曰吾少也困不能忍人困且富貴非生有也子孫自力爾會恩詔有引年之典得膺冠帶以家政付其子鸞與鳳脩業而息之家復大振三子鵬推擇守備雲中詒之書曰

努力爲國家脩禦圉之備吾佐若廉歲率齋數百金鵬用以推帳下得士心撫制邊疆夷人懷而畏之擢八爲神機佐擊將軍得朝夕起居迎而喜曰兒勞苦邊事今歸矣文明旣家京師常以去墳墓捐親戚爲恨蒸嘗伏臘悲涕沾襟常稠疊寄遺以爲諸弟資會弟文燦文聰自故鄉蹶躄而來相持泣已欣然共案食共被寢夜分相與語貧困時事絮且復泣未幾遂卒三子二弟環與屬纊蓋孝友之報云莊履豐哭以詞曰於乎丈夫而豈長貧以爲不信視公之身於乎旣富好行其德以爲不

信惟公是則已復列其狀余少宰爲之銘

節梅谷集

蘇墀宗字載益號翠榕晉江人五歲而孤兄亦繼歿諸孤
纍然墀宗方成童未離學舍屬郡豪利其貲謀齟齬之
遂棄佔俾肩戶內外事家難頻仍備嘗艱况事生母依
依孺慕滌裙廁褌奉嫂氏維謹撫孤姪如己出慷慨慕
義趨人之急如身當里中宿罇猝搆得其言立解謙抑
慎謐不以氣加人里遭兵燹移就郡城貲落而好行其
德如故有素交羈於寇鬻田贖之不足復益以妻之簪
珥襟期洞豁而課子孫獨嚴細故輒加讓碧湖故有紫

泉州府志

卷之六十一 明樂善

二十七

陽書院年久傾圮謀諸父老重新之堂庶煥然春秋不
忒子登第令滋陽貽書戒以母飾厨傳發宜亟散宜均
年六十三卒子守一

節雲臺藏藁

劉應寬同安人曾祖璠本江西玉山人元至正閒爲同安
縣尹卜築於縣城庫內巷遂家焉應寬樂善好施有安
仁里人夫妻哭子喪明乏食捐租十石給養又憫貧人
暴柩爲買社稷壇邊地施葬邑人廣文洪居正爲作義

地記 同安縣志纂

黃昕字載旭號菊軒南安人七歲而孤事□□兄以孝弟

聞田賦歲入聽兄主之比析箸辭腴取瘠課家僮數十輩力穡灌園治漿醞勞之非大過不輕譙呵皆感奮盡力甌簞加滿丙申大侵豪家輒匿宿儲以邀厚直昕獨散積粟數百斛以周鄉里全活甚衆尸祝焉妹夫陳姓爲仇所搆被繫竭力解脫妻弟業儒貧落爲佐饗殮得列青衿與鄉隣雍睦無閒自少至老未嘗有牙角諸交質必籍昕爲信邑令屢延鄉賓不就後復上其行誼于臺使請冠帶旌之未至而歿年七十六

節楊文恪文集

洪松字國明號錢峯晉江錢與人移居郡城父母繼歿貧

泉州府志

卷之六十一

明樂善

二十八

不自給乃入安溪湖頭市人見其狀貌魁偉貧家爭取糈餉之繼而賈者與處知其善擘畫且誠信益敬禮焉市有道人相其貌當不貧輒周旋又有藍媪留松與居視若己子自是得借資于殷實家持籌握筭貲由是起益居積種樹牧畜出貸子錢收而息之漸致饒裕於是歸錢與葬二親卹宗人之貧者酬向日取糈相餉者各數十金道人歿經紀其喪追薦之厚報藍媪存問終其身發金錢數千緡脩牛獅嶺治湯頭橋行人便之歲疫施糶百餘出粟賑飢呈官請禁包糴全活甚衆郡人皆

重其義云

節景
壁集

黃思詔字有從南安人河清姪萬歷己丑歲貢廷試授訓導不仕歸爲鄉興革利弊脩萬石陂水利邑人賴焉子一長萬歷戊戌進士以丁父艱歸哀慕不輟卒于家孫日耀年十五登萬歷丁酉鄉薦

南安志

張遴惠安人峯孫萬歷丙子鄉薦家居孝友會歲歉勸父廩生察蠲租賑飢里人爲立碑嘗棄金還妾見獎于當道八上春官卒子鏘癸卯鄉薦侄鑛己酉鄉薦

惠安志

劉柳字才澤安溪人春兄好施濟全活多人邑令爲請授

泉州府志

卷之六十一

明樂善

二十九

義官令有難折之獄送柳諭解之民稱其平祀忠義

安溪志

志

李呈春字于煦惠安人愷子田太學生授廣西按察知事時值征徭轉輸糧饟能於其職擢丞土饒授光祿署正以歸爲人尙義好施萬歷丙申歲大飢出粟煮粥賑貧洛陽橋石梁傾塌太守姜志禮圖脩復之延呈春董役倡義捐金爰址整築邑人爲勒石道左

惠安志

陳以廉號我泉其先漳人徙居同安織絹爲業而惇誠慷慨不類市中人邑東同山朱文公大書深刻在焉山故

祀五顯大帝屹爲東鎮廟圯移神於溪澗第二橋萬歷壬午邑南人釀金新之先是溪漲浮大木長丈許上書大帝二字廉不惜價購之至是乃募匠鏤帝像一切磚瓦木石工匠之需廉皆身自程督卽錢穀不靳胼胝不辭越乙酉告成前殿後寢神堂僧室巍煥軒爽又捐貲買耕地若干以給常住歲時奉香火焉邑西三十里有溪曰黃樵爲安南二水之滙山夾峙石參差大浸則沒牛馬諸道居民募衆造橋踰年復決廉捐貲以終其事且建廟橋左以憇行人於是來往稱坦途邑令洪世俊

泉州府志

卷之六十一

明樂善

三十

以學宮前文峯不卓謀建塔鳳山之巔衆舉廉董其事延至縣堂花紅鼓吹從中甬迎出廉奉命程督如同祠而加毖焉其秋塔成明年辛丑許繻遂魁南宮廉五十未子己卯五月朔夢神人雲中呼曰而刻我像我昌爾嗣及戊子而妾舉諸生應震焉廉歿二十餘年羣議塑像以存檀施蔡獻臣爲文紀之

節清白
堂稿

洪以誥字德益號雙林南安人移晉江爲諸生事父母盡孝兄弟及羣從視如手足篤親舊重然諾急人之厄妻弟貧窶周給無虛日沒撫其孤二妹適人一際時艱一

遭家難悉心綜理哺煦之倭寇充斥英山田僕投主舍
或自賊巢歸疾疫傳染衆議格勿納以洗置諸旁舍病
予藥沒給櫓而家中于指竟無恙寇退蒼頭閒行還里
徼卒捕以爲盜詣郡庭爲申請得解宗人議築堡捍賊
以洗腴田若干在營度中捐以成之構書舍以課子額
曰三惜軒集英俊角藝課其甲乙年四十五卒子有觀
訓導有助萬歷壬辰進士廣州知府節田亭草
陳存恕號振齋晉江人家貧棄儒就賈稍贏裹裝入粵先
世遺業盡推與弟累葉祀事悉身肩之無所旁貸嘗遊

泉州府志

卷之六十一

明樂善

三十一

莆中有遺金于市者拾之慨然曰奈何使道有拾遺之
誚而我無還金之誼候於道旁忽有號泣來者曰吾鬻
子完糧僅得五金今又遺脫何以生爲亟撫而還之其
人泣謝去在粵子姓來依者推解更年不替以儒業至
者極力周旋且爲游揚其旅化無資者爲殯殮周親頌
德粵人亦推重之節霞棲藏藁
田雲龍字德從號騰江晉江人爲諸生試恆異等家貧授
徒自給嘗攜篋趨建業已復遊燕邸黃鳳翔舊有姻婭
延爲子師蜀人李少宗伯遣其子胤祥受學焉宗伯雅

自負與談文輒心屈爲其子慶得師既而允祥登第授庶吉士及鳳翔假回雲龍偕之歸慈祥醇謹爲鄉人所慕共推主里中正有構必就質立爲諭解卽爲所短無不心折者會權稅議起諸牙儉蟻聚蠅營請繁征下逮蔬菜且謀及汎舟之役雲龍拂然曰泉土瘠民稠仰哺吳浙若征及海艘穀米恐諸奸漁獵商人阻畏是重困吾赤子也官司亦何利之有遂陳牘于邑令極言其不便狀令是之議遂寢閭黨翕然頌德焉

施濟民號玉溪晉江潯江人尙義好施家無餘儲僅收數

泉州府志

卷之六十一

明樂善

三十二

斛麥萬歷閒值年荒有告匱者輒取麥分給之升合不留家濱海往來商艘遭風飄泊里中無賴少年伺閒剽奪濟民涕泣勸戒語必刺骨聞者怵焉足不履城市有拾他事誣訟之者夷然順受雖傾家不校也其妻許氏同心行善虔事北斗一日霜雨連綿暮有老婦造門鶉衣百結留飯之置寢所聞呻吟聲憐其寒與同榻體恤備至黎明別去謂許曰爾積德如是子孫必有興者行數步忽不見孫靖海侯琅

近時新案

傅志節字君惠南安人晚遲子少治鉛槧數奇不遇遂恬

脩課子爲人慷慨知大義嘗慕郗嘉賓范堯夫之爲人
歲大侵施粥濟飢至鬻田以繼之家席父祖遺饒以緩
急酬應遂成寒窶然終不持券求理將歿盡取而火之

南安志

陳啓璣晉江人爲縣吏生平不犯二色好行善遇貧人輒
與方便萬歷丁巳有繫于獄者值改歲爲白于官獲釋
約謝銀五兩僅送四兩六錢詰其故則曰原賣一女銀
五兩爲媒者取去四錢是以缺少啓璣惻然曰汝未出
獄家尙有女今出乃無女共守歲立反其謝金並湊銀

泉州府志

卷之六十一

明樂善

三十三

四錢令贖女完聚後遊粵東一夕道行昏仆被二冥卒
攝去見殿上人曰誤矣此善人也引坐案側看判事一
起不孝一起貪官受賄冤平民一起棄妻寵妾種種加
刑畢顧啓璣曰汝不犯二色多行善事應生貴子衣以
綠袍遣卒送回遂甦明年果生子韓遴順治乙未登進

士官至銓藩贈如其官

近時新案

謝振玉南安人誠厚質朴與物無競崇禎壬午歲大飢傾
困以賑佃丁貧者不貢償恆給以牛種而貸其稅每諄
諄勸人爲善常曰人善人欺天不欺人惡人怕天不怕

值寇亂闔家獨完以壽考終長子允鰲康熙己酉歲貢

三子允元康熙丙午舉人

南安志

國朝樂善

王良

李廷碩

黃朝宗

涂世惠

陳御飛

李朝俊

林德尹

吳琰

曾邦慶

陳開峻

林綠苔

楊令暉

泉州府志

卷之六十一

國朝樂善

三十四

吳錫璉

駱鍾岳

周戴鳳

施韜

李夢植

黃世美 孝緒 孝績

蘇未觀

王朝俊

施馬英

陳萬寶

謝拱春

林志清

陳國和 國詩

胡天德

顏孔輔

施世榜

涂正昇

林汝舟

許朝輔

吳鵬程

陳鴻猷

陳元椿

陳王春

陳朱鵬

黃中柱

張廷毅

陳宸

陳文煇

林元起

白紹芳

葉方榮

方菁

陳士珂

天聲

柯士元

林芳德

王綸禮

周廷樑

岐德

泉州府志

卷之六十一

國朝樂善

三十五

○王良字遂侯號毅菴同安人居晉汪以隨征臺灣功

授左都督職銜值邑令清復銅魚古蹟計費浩繁良慨然

任之又施櫓于縣城建朱文公祠于其鄉子天慶貢生

知縣觀濤康熙辛丑武進士斌康熙辛卯武舉人任海

壇營守備乾隆元年以長子天慶貴

覃恩誥授榮祿大夫

同安志纂

○李廷碩字孫膚晉江人明給事焜長子為諸生好義勇

為郡南溜石三陡門為焜所築康熙甲辰洪水崩決已

酉復大決廷碩念先績傾頽自砍祖山柏木二百株仍

捐貲捐工爲諸鄉倡衆皆樂助方舉工值霖雨洊至人多疑沮廷碩謂天祐下民必無雨患既而雨息潮退履危歷險風日不避兩月竣功斷橋既完水流復滿是歲秋冬大旱獨南鄉諸田獲收邑人張潛夫爲文紀之

張節

確菴
碑記

○黃朝宗字國棟晉江人孝事父母甘旨必親供堂兄貧不能自給按月給以蔬米得不匱族子無依者周恤而婚娶之家居中洲值大水衝決田廬捐貲脩築馬頭堡數百畝嘗拾遺金五十兩守以還主不受謝子呈元康

泉州府志

卷之六十一

國朝樂善

三十六

熙癸巳舉人

通志

○涂世惠字仰螺惠安人有至性康熙十八年值海氛母病在床人謂寇至且暫避之對曰子避母將安歸亡則俱亡耳賊憐而舍之兄歿家貧視二姪如子教養成立俱列于庠雍正三年歲飢減餐賑濟錢米十日郡太守張無咎獎以金幣詩箴雍正七年疫捐櫬百具以濟貧不能殮者生平不履公庭鄉鄰忿爭善言勸解得免訐訟乾隆元年紳士僉舉孝德咨部給八品頂帶榮身乾隆二年邑令馮永振給扁曰媿美耆英年八十九卒子

孫多列雍庠

○陳御飛同安諸生母久病顛天請代得痊好嘗捐田以通水利立石以表孝節施棺木脩橋梁康熙二年浯島播遷周給族戚鄉閭義之同安志

○李朝俊號成齋安溪人少孤稍長克自樹立痛父不逮養置田於宗祠迎父祀焉族黨姻戚緩急相卹歲飢平價以糶煮粥以賑施櫛百具以給貧不能殮者邑令屢延賓席以孫清雲貴 貲贈徵仕郎內閣中書舍人安溪志

○林德尹安溪人倡建土堡脩葺宗祠康熙庚申米價驟

泉州府志

卷之六十一

國朝樂善

三十七

昂躬往永春買米運回平糶有窮乏者負其直亦無所校里人義之安溪志

○吳琰字隱甫晉江人世傳神糶秘方治百病以此獲貲而好義樂施隨手散盡朔望給米與飢者冬月買舊衣冠以給寒者施藥施棺無所吝脩築萊山三石橋南安霞舒坑尾橋西門外晉南交界東關嶽口至七里庵亭大路又葺紫帽山金粟洞倡建鳳山寺寺外爲亭以憇行旅泉遭海氛後暴骨如莽約同志拾之彌月爲義塚於鳳山麓封焉年九十四卒以子雄畧康熙甲子武舉

任江淮衛千總加一級 贈武德將軍里人陳高翔爲
紀其遺事

○曾邦慶字維章晉江人生而根器淳厚侍父母盡歡丁
播遷之變父母相繼淪喪棄舉業出走四方歸家頗饒
裕卽議建祖祠爲族人倡脩葺遠代祖塋其長兄沒後
二侄幼穉撫摩無異數十口合食如故性慷慨好義賜
恩山之右有龜巖乃前人建祀土神陶善人年久僅遺
荒址邦慶慨然獨力創蓋至親黨有困乏者推施亦多
不吝鄉鄰嘖嘖稱之年八十一無疾卒

泉州府志

卷之六十一

國朝樂善

三十八

○陳開峻安溪人爲人樸實敦宗睦族凡有貧乏輒周恤
之康熙癸巳歲飢出粟以贍族黨邑令蔣廷重贈以匾
年八十九卒

安溪志

○林綠苔安溪人性孝友分產時母命以腴產與兄無難
色康熙間蔡寅寇掠綠苔出寨餉以保鄉閭晚年遍收
枯骨築爲二堆命子孫世祀之

安溪志

○楊令暉字子光號省亭南安人援例入貢持忠信重然
諾好施與不言德值歲荒出粟煮粥以濟鄉人年八十
一卒子宗澤進士西延同知

○吳錫璉字文真南安人性淳厚篤于一本濱海播遷後連丁兩喪寄跡于外獨力經營得饒裕遂移兄弟眷口團聚粵中而宗祠祀田祖茔亦以次脩建嗣是諸猶子策名仕路出任監司郡守勉以盡職傾囊以資無難色康熙癸巳閒粵東災荒錫璉煮粥以賑全活者多粵人至今稱之以子澤民職銜

勅封承德郎年七十一卒

雍正志稿

○駱鍾岳字維琛惠安人幼喪母隨兄事父服養若成人及長以孝聞後父沒悉力誠慎不少累于兄性復淡約

泉州府志

卷之六十一

國朝樂善

三十九

好自儉以濟人每遇歲歉輒分贍宗黨匱乏者雍正乙巳惠大飢疫浸盛行死■藉道鍾岳先計族人按口授粟而以其贏糶米三百餘石爲槽二百餘具濟諸無告邑令鄺夢元恐其力不贍勸同志贊襄之惠人德焉上其事於官郡縣皆立扁旌之制府撫軍並錫以詩箋邑南半嶺亭一帶溝渠漲發民皆病涉捐貲建橋以利行旅興泉道朱叔權題其橋曰樂善爲文記之又脩北關外道路自居仁至塗嶺計長三十里年五十四卒

○周戴鳳同安灌口人買山二處一在塔塘一在陳井以

作義塚在灌口施榼二十年在溪邊施五年費俱不貲
○施韜字文起晉江人少孤鞠於母林氏長隨世父琅軍
中十餘年著有勞績得官矣顧恬於仕進家居孝友樂
善好施賑灾荒凡十餘次戊寅同安水灾捐金五百買
灣田分濟被溺諸家戊戌泉郡大水傍溪居民乘城避
者幾千人煮粥汎舟分給以迄水退設育嬰堂以收棄
女捐社倉粟以備不虞橋梁脩造自省抵漳大小計百
五十有奇晉之河市南之小羅溪同之洪濟飲亭諸橋
俱費白鏹盈千多碑而頌之至於捐榼捨藥排難持危
泉州府志

卷之六十一

國朝樂善

四十

傾囊倒篋難以更僕也年七十六無疾而逝子士隆襲
功加都督職士嶽官憲副

○李夢植字世寬號澹齋安溪感化里人太史光龍侄四
歲失怙有至性見母洪氏冰蘖孤貞輒哀愴動人稍長
與伯仲及季怡怡奉母咸謂苦節之報夢植頗積腴輕
財好施有祖森遺風痛父不逮養贖歸公祭田俎豆之
宗祠以榮之辛丑海澨播遷繼甲辰潦灾比歲大浸流
寓多煢瘁夢植分給舉火如是者數年死不能葬者施
榼以百計砌石梁大小十餘所民不病涉築仄路以便

行旅蠲荒租以甦貧佃蓋祠廡建覺亭葺頽剝悉傾貲
不吝耆民僉舉善人令楊貞旌廬示獎安溪志參
榕村全集
○黃世美字立宇惠安人尙義好施拯困扶危康熙戊午
海氛方熾出遇故人子王錫棄於道攜以偕馳爲寇所
獲訴而義之得俱全及

大兵至寇退走負海盡驅所掠婦女艤舟港日索贖世美
歸發窖藏爲親隣贖還數十人乙巳惠飢而疫散財給
糶不遺餘力邑令鄭夢元申於上官給匾旌之子孝緒
字纘之爲諸生力學淹貫父有義舉多贊成之郡城改
泉州府志
卷之六十一 國朝樂善 四十一
建考棚捐金以助惠北路圯倡義脩葺郡守王廷諍錫
以匾勒石道左癸酉舉應鄉賓次子孝績字懋之監生
河工効力雍正間

朝命州縣以上各保一人澂江守黃煥彰特舉孝績以父
老未就壬申大雨惠城傾壞幾半績倡義捐脩完固邑
令徐德峻申藩司錫匾褒焉

○蘇未觀同安積善里人康熙庚申往永春販布是夏穀
貴斗米一金未觀將資本三百餘金盡數散賑又施糶
百具以殮餓殍永春載之邑志在本邑見葉氏夫婦因

貧反日出銀十六兩助之勸令相安粵東出銀十餘兩以恤獄囚廈門新路渡頭壞捐資三十五兩脩葺又倡脩深青橋行人便之

同安溪志
永春舊志
參

○王朝俊同安人南澳遊擊康熙庚申邑大飢俊買米八百石煮粥分濟仍每日人給米一升全活甚衆

同安溪志

○施馬英安溪新康里梧陰鄉人父淵叔素尙義馬英年甫十六康熙三十三年九月間有往府城代人買子爲嗣者覓未獲帶銀十六兩回至本鄉松樹潭路邊銀包遺落馬英拾得坐守以俟其人行二十餘里轉回徬徨

泉州府志

卷之六十一

國朝樂善

四十二

四顧將自裁馬英立將原銀給還取二員爲謝堅却弗受同鄉監生林郇宣義之贈以穀十三石

近時新案

○陳萬寶字時初一字懋齋安溪人居晉江遷鶴長子少敦孝友尙行誼未冠時隨父避亂詩山常抱甕持竿以佐膳羞蚤夜偕仲兄季弟然脂讀書以娛親心稍長有文名以浦城籍應試督學拔第一旋補餼父宦京師二十年凡先人宅兆未安萬寶俱卜吉襄事無貽父憂次弟歿撫兩孤侄如己子爲經營產業以畀之丁丑丙戌泉郡大侵飢人載道悉捐所有煮粥於承天開元二寺

以食貧者泉人義之安邑令許封男卒於官旅魂飄泊捐貲遣家人護其櫬歸江右其施德於不報之地如此康熙壬午登賢書束裝北上覲省居二年病劇旋獲痊歸一年而父亦旋里承歡膝下年餘而卒年四十九子覺世雍正甲辰舉人孫興國雍正丙午舉人都察院都

事

安溪志
陳謙季撰誌

○謝拱春晉江人生平好善効力戎閒寧海將軍喇公命假海兵裝巡界適寇掠婦女八十餘口于舟中以計盡脫之身幾遇害兩故人庇之得免還報大將軍大加獎

泉州府志

卷之六十一

國朝樂善

四十三

賚給守備劄

○林志清安溪湖區人其九世祖敬宗曾募造緣施橋年久傾圮志清捐貲重修之復倡建洪恩古剝鳩鑄福善堂銅鐘並蓋三寶殿所貯稻穀依賤時價平糶鄉人德之歿遺命以所植杉木創建新峯巖撥租三十石供佛齋僧其後子孫昌熾

近時
新案

○陳國和國詩同胞兄弟同安人孝友之行老而彌篤又善推恩族有無妻者爲聘娶貧不能治喪者資之施櫬二十載施藥三十年通邑稱爲二難邑令先後延爲鄉

賓同安志

○胡天德同安鼎美人援例爲國子生有王姓四代單傳貧甚欲鬻其子天德憐而周給之得完聚卒成立遇災施糶代償誣贓隣有母喪不能葬欲自沈於水聞而助之人稱義舉同安志

○顏孔輔同安後塘人舉鄉賓梵天文公書院歲久將圯孔輔獨肩其任不辭勞不惜費書院巍然一新康熙五十八年復捐重貲脩整文廟繚垣易土以磚堂廡俱極堅固移建武廟亦得其助城西西橋綿亘百餘丈康

泉州府志

卷之六十一 國朝樂善

四十四

熙間毀於水雍正二年孔輔捐資重造爲費甚鉅行人

賴之同安志新繳冊

○施世榜字文標晉江人鳳山拔貢生樂善好施於族姻閭里之貧者周卹不倦嘗建敬聖亭于南門外以拾字紙置田千畝充海東書院膏火又令長子貢生士安捐資二百兩脩葺鳳山文廟令五子拔貢生士膺捐社倉穀一千石其在晉邑脩理文廟及橋梁道路亦多所襄助授壽寧教諭擢兵馬司副指揮告歸採臺灣志

○涂正昇惠安監生十二歲父病篤奉侍湯藥呼天求代

父歿擗踊號泣絕粒數日人謂奇孝異兒母患目疾以舌舐之復得奇方洗滌母目漸明旣而母得心病割股愈之得享餘年事兄友愛母歿復遍遊吳越東寧所獲貲盡歸兄主之兄歿撫姪如子雍正四年歲荒流離載道傾貲賑貧田丁租穀槩行蠲免稱貸文契亦皆焚滅乾隆十八年大疫施糶無數郡邑及省中大役如脩學宮葺義學建貢院改考棚脩洛陽順濟各橋俱有捐助生平儉樸自持絕去圭角足未嘗履公庭年六十四卒有子二人爲諸生

泉州府志

卷之六十一

國朝樂善

四十五

○林汝舟安溪人雍正間曾捐貲脩邑文廟兩廡郡邑

錫匾以獎之

安溪志

○許朝輔安溪人素好義常施糶以殮貧喪逢節延浮屠

宣經爲造福雍正間舉鄉賓年七十五卒

安溪志

○吳鵬程安溪貢生孝友樂善雍正丙午歲飢遵父命出粟煮粥賑濟多所全活歷任邑令俱重之贈以額卒年

六十七

安溪志

○陳鴻猷惠安人援例爲國子生性好施與雍正三年邑飢捐錢米於城隍廟煮粥散賑十日邑令備酒果致禮

鼓樂送歸督撫給以義高任卹樂善好施匾額郡太守
加送樹德務滋匾額

○陳元椿字永年惠安人少失恃事繼母孝年十三父歿
繼母遺腹弟在襁父遺薄業俱爲繼母養贍不與弟分
性好施與雍正乙巳歲飢捐賑病者施藥亡者施棺脩
橋梁葺寺觀惠邑 文廟就圯獨任其役未成而終仲
子文輝繼成之有司詳奏建坊

賜額樂善好施文輝 授通判三子如雄武進士官遊擊四
子鳴夏武進士官提督

泉州府志

卷之六十一

國朝樂善

四十六

○陳王春字伯元同安人由監生捐職州同孝親睦族建
祖祠置祀業尙義好施助設育嬰堂倡建縣堂重造南
門橋塔塘橋又自造積善里英溪寧濟後埭三橋行人
利賴督撫學使郡邑長各給匾獎焉年八十五而卒

○陳朱鵬同安人有弟早故遺二男朱鵬撫之凡飲食衣
服先姪後子後商於廈門有呂某負官糖將鬻孫朱鵬
以金貸完泉人義焉

○黃中柱字伯砥惠安人素尙義好施邑西南十里許地
名茭布厝爲永春孔道遭水衝決行人跋涉維艱中柱

捐貲建造石橋計長二丈有奇徃來稱便雍正丙午飢疫交作捐施錢米餓者賑粥亡者給槨郡邑各送花紅獎勵督撫給匾旌之後舉應鄉賓

○張廷穀字鍾美號怡仲晉江監生少讀書有大志年十九從伯兄持籌於三山之中洲泉中鄉會試賓朋多主其家凡省中交遊婚喪疾病以及脩葺道路津梁廟宇皆隨力應之無所吝雍正戊申福州烈婦楊氏以死殉貧不能庀事廷穀慨然出白金若干兩爲營殯葬時泰山趙公國麟爲方伯聞其義舉延廷穀至紫薇堂躬自酌酒具金花馬幣鼓樂迎遊四衢以爲尙義者勸仍贈以扁曰南邦傑士晚歸家課兒孫耕讀勤儉粗衣糲食不事華麗至祭祀宴客必從豐鄉里重之年七十四卒胞侄有泌雍正壬子舉人宜黃知縣

○陳宸字黼若惠安人元椿子爲諸生試多前列善體父志凡有義舉皆佐成之復推父所未逮捐建 文廟樂器祭器重建養濟院碣石橋陡門橋督撫會題以優行升國學子上升乾隆丁卯舉人國璜癸酉舉人國寶壬申武舉

○陳文輝字庭若惠安人元椿子以捐職州同 授通判性
好義建邑義學葺城隍廟脩大路一百里癸酉惠邑飢
疫施棺出積穀平糶其餘如脩城垣造橋梁以及泉郡
興建諸事皆竭力助成之治祠宇充祀田脩譜牒有功
宗族子兆勲乾隆丁卯舉人 授內閣撰文中書舍人國

器國珍武進士

採陳氏
紀實

○林元起安溪監生淳樸好義嘗買地以收瘞道旁露骸
鄉人頌之

安溪
志

○白紹芳安溪人爲諸生持身端謹倡脩古剝興復祀業

泉州府志

卷之六十一

國朝樂善

四十八

鄉間重之子大成乾隆辛酉舉人

安溪
志

○葉方榮方菁俱安溪人同胞兄弟俱爲諸生好施與嘗
捐銀七百餘倡脩祠宇施櫓百餘以殮貧喪有舟子窮
迫將鬻其妻菁資以銀十六兩得完聚焉

安溪
志

○陳士珂安溪監生惇謹好義值兵燹有被掠者出貲代
贖之子天聲爲諸生遇飢煮粥賑濟道路崎嶇者募工
脩之以便行旅卒年八十二

安溪
志

○柯士元晉江塘市人捐貢生本都有湫田塘灌注三千
八百餘頃爲三都民命所關屢遭大水崩壞士元出已

貲脩築之捐銀四百餘兩倡建祠宇仍備春秋祭費太守王廷諍因社倉缺粟勸捐士元獨捐粟一百二十石貯倉諸義舉多類此年六十三卒

○林芳德同安人捐職州同嘗捐百金重修梵天文公書院改造嶽口理學名宦石坊施棺十年費以千計所居馬家巷有通利廟爲朱子簿同時所題芳德重新之復於其後建閣以祀朱子計費五百餘金邑令張荃立碑記之

○王綸禮南安人乾隆閒歲貢事父以孝聞沒喪葬盡禮

泉州府志

卷之六十一

國朝樂善

四十九

與庶叔父合食通財無異視性慷慨好施與族戚里黨積年借貸不下二千金一日悉取其文券火之不責償雍正十年邑亢旱歉收凡佃丁應納租穀悉免之仍出貲賑卹近鄉窮民全活者數百生平言規行矩謙退白持卽有非意之加逡巡不與校足跡未嘗一至公庭邑中橋梁道路有傾圯損壞者或專任或贊襄不惜脩治之費乾隆元年興脩文廟偕太史洪科捷倡首捐資庀材鳩工至忘寢食用克成功督學戴公瀚錫匾曰律度呈芳太守許日熾造廬優獎督學周公學健以優行

旌焉

○周廷樑同安人事親克供子職撫弟侄友愛無間祖祠傾頽獨力脩建族姓貧乏者加意存卹鄰里喪葬極力攸助遇歉歲寬田丁租入貧者卽爲破券橋路廟宇隨力捐脩雍正十年舉應鄉賓乾隆二十二年以子遵例急公 贈中憲大夫子岐德監生捐州同加五級善承父志捐脩本邑 文廟明倫堂朱子祠玉屏書院鳳山書院及苧溪考溪塔仔塘等橋本府南鼓樓新橋會城貢院皆有捐助又嘗以事至臺灣與廩生侯世輝等倡建

泉州府志

卷之六十一

國朝樂善

五十

文廟計費七百餘金事竣具題議叙

泉州府志卷之六十一終